

AN DURZUNEL

Kalz amzer a meuz kollet
O furchal ar c'hoajou,
'Klask tapout eun durzunel
Kousket war ar brankou.
Dévet a meuz va amors
Ha tennet a meuz fall...
Achapet an durzunel
Ha nijet d'ar c'hoat all.

Deuz an noz ha gar mintin
Me'glew al lapoused
O kana, o fredoni
War veg ar gwe pignet.
Méz, n'euz hini anezê
Hag a douch va c'halon
Evel mouez an Durzunel
O ouela d'he mignon.

Hirvoudi a ra noz-de
Gant ar boan, ar glac'har,
Evel eun intanvez paour
Kollet ganti he far.
He mouez a zeu betek d'in,
Hag hi'zo glac'harus ;
Ha me da c'houlenn outi
He foanion truezus :

— « Petra, Turzunel yaouank
A dourmant da galon ? »
— « Kollet a meuz », emezi,
« Va fidela mignon.
Mar na zeu eur chaseoar
Da ober d'in mervel,
Me'varvo gant ar glac'har
D'am mignon fidel. »

« N'euz na souten, na remed,
Na konsolasion,
Barek da zont da zistan
Ankenion va c'halon...
Trec'het on gant ar glac'har,
Mout a ran da vervel :
Méz na varvin ket kontant
Ma na varvan fidel. »

Gwelet a meuz o vervel
An durzunel yaouank,
Dizec'het eo va c'halon
Gant ar boan an tourmant.
En he huanad diweza
He deuz c'hoaz lavaret :
— « O va gwir vignon fidel... »
Raktal eo tremenet.

— 12 —

Mellezour sklér ha brilliant
 Deuz ar fidelité
 Te eo ar skwer ar gwira
 Dimeuz ar garante.

Nann, na varvin ket kontant,
 Mar na varvan fidel :
 Birviken na zizonjin
 Maro an Durzunel !...

RIMADELLIG

Pater noster, dibidoup :
 'Man va c'haz o nea stoup,
 Ha va c'hi war lein an ti
 Oc'h oza boued d'an houbidi ;
 An diou vioc'h dorn ouz dorn
 O kas toaz d'an ti forn,
 Ha va mamm war greiz an hent
 O krial forz war he dent ;
 Va zad koz etal an tan
 O c'houll' petra 'vo da goan :
 — « Yod gwiniz du
 Ha bac'hadou euz an daou du...

Yod minus kerc'h,
 Ha bac'hadou war he lerc'h... »
 Ar C'harveg hoz o vont d'e lein
 Eur c'hoz tranmaillou war e gein ;
 Eur voutez koat en toull e rér
 D'ober d'ezan hasta kaër.
 Iron varia Koatnevele !
 Krampoez, gwiniz ha chufere ;
 Da viz maë Avalou glaz.
 An hini' oar a laro c'hoaz.
Tamtibidoujen, tamtibidei
Ar C'harveg koz 'zo potr anei !

